

實用

中醫典籍寶庫

第廿二冊

綫裝書局

咽
喉
脈
證
通
論

撰人未詳

重刻咽喉脈證通論敘

咽喉。昔人方之輿地。固險要之區也。扼之抗之。並制人之命。第其事有相背戾者。於地爭得之以制勝。至夫疾證則隘於此者危矣。然亦未嘗不合。人居險地。以軍勝之。疾得隘地。以藥療之。客主之形不同。攻擊者之情一也。夫治。以懸軍勢。而用奇者勝。又維守關。鍾會攻之。未能克。鄧艾由邪徑趣濟。吳人於江險。積鐵鑊橫截。于潛水。鑊成之。並覆去鐵鑊。則隘之用。什倍湯。蜀人之劍閣。吳人之鍾離也。此脈證通論一書。相傳出宋時。杭下。僧中。其十八。皆精要無類。吾友許子。璉嘗槩之。生人不可計。世固不知其用藥禁忌一第。昔人嘗昧之。所謂吳人。蜀人之敵者也。亦猶七國之韓。欲援之而欲以併之。固必有道在矣。因續授之梓。而記之。

道光二十有一年歲在辛丑閏三月吳興姚榮芳林北堂書

醫家十三科。咽喉居其一。誠以氣之出入。生死之關。事醫者不可不審求也。內經曰。喉主天氣。咽主地氣。欬論篇曰。心欬之狀。欬則心痛。喉中介介如梗狀。甚則咽腫喉痹。厥論篇曰。手陽明少陽厥逆。發喉痹。噤腫。瘰脈解篇曰。厥陰所謂甚則噤乾熱中者。陰陽相薄而熱。故噤乾。骨空論篇曰。督脈生病。治督脈。治在骨上。甚者在齊下。營其上。氣有音者。治其喉。中央在缺盆中者。其病上衝喉者。治其漸。漸者上俠頤也。謬刺論篇曰。邪客於手少陽之絡。令人喉痺。邪客於足少陰之絡。令人噤痛。不可內食。又曰。噤中腫。不能內唾。時不能出唾。考內經所言喉證者。凡謂臟腑之氣痹。著於其地而已。無所謂十八證三十六證也。惟靈樞經篇。岐伯曰。癰發於喉中。名曰猛疽。猛疽不治。化爲膿。膿不寫。塞喉。半日死。則類喉科之乳蛾。而屬之癰疽。仲景去先聖未遠。其金匱玉函所載雜病。並無喉證。正與內經相合。李東垣劉河間爲金源巨手。所著諸書亦不載是證。獨朱丹溪有喉痺一門。第以臟腑爲主。分經施治。則亦內經之支也。海甯許珊林槿得喉科書一冊。於其鄉之世業是醫者。題爲朱異僧所遺。以其篇第考之。卽所謂十八證也。先總論病態。而繫以藥。後詳方證。復列用藥禁忌。且以甘桔湯爲喉證所忌。一掃俗醫誤執成方之謬。是能獨具手目者。以其喉證爲火毒上升。用藥降氣瀉火爲主。卽靈樞猛疽之意也。其以病起何經。用何藥主治。卽內經丹溪之法也。夫善讀軒岐書者。固可隔垣洞見。何待檢閱之煩。然則此書之作。蓋爲俗醫設也。且爲無醫設也。俗醫與無醫。則此書之功偉矣。珊林因舊刻之訛。重勘而精梓之。家兄聖常惜其傳之不廣也。郵寄本重鈐。因括其大凡於左。道光辛丑閏月之望。吳興姚衡書於廣州撫使者署之雨春館。

校刻咽喉脈證通論序

或曰宋有異僧者。寓杭之千佛寺。遺一囊去。寺僧啓之。得是書。祕不欲傳。今尙有能世其術者。余曰唯唯否否。夫方技之書。類多託於畸人異士。隱僻怪誕者流。神其說以炫人耳目。是書苟宋人作也。不應有棉花瘡云云。此疾元時始入中國。何先數百年已能言之鑿鑿如此邪。第綜其方論。凡夫喉證之虛實緩急。辨析造微。多所依據。則知非近人所能。苟非宋。亦不出元明間一巨手耳。余先後獲四五寫本。率爲庸妄人竄改塗乙。故各各不同。及見禾中葉本。益紕繆滋甚。因卽數本中排比參校。窮數月之力。如理亂絲。不啻數棼之而數析之也。今年夏手錄定本。友人楊子星泉見而避之。星泉今俞附也。殆不至阿私所好。以貽誤後人者。還授之梓。以永厥傳。簡首仍署曰宋僧原本。亦疑以傳疑意爾。夫豈敢神其說以炫人耳目哉。是爲序。

道光五年乙酉六月海昌許樾撰。

咽喉脈證通論

總論

通治用藥

用藥禁忌

丸散方藥

牛黃解毒丸

紅內消散

保命丹

磨冰消毒散

冰硼散

玉屑散

鎖喉第一加減荆防敗毒散

重舌第二

氣癰第三

乳蛾第四

弄舌第五

纏喉第六

啞瘡第七

骨槽第八加減當歸連翹散

懸蜚第九加減千金內托散

爛喉癰第十犀角解毒膏

熱風喉癰第十一涼血地黃湯

弱證喉癰第十二

喉閉第十三四順理中湯

噎食第十四當歸連翹散

發頤第十五南星膏

懸癰第十六

喉菌第十七

牙癰第十八

總論

夫喉者。吾生氣機出入之門戶。瞬息存亡之際。性命係焉。偶一受病。危在須臾。迫不及待。所貴醫者能識受病之原。與夫虛實痰火風寒熱毒之異。更於望聞問中參究脈理。尤爲先務之急。自來業喉科者全不

講脈。所以治之鮮效。今試論之。假如其脈洪大而實。其人氣粗而躁。此有餘之證。用藥則以散風下氣清火消痰。散之者。荊芥、防風、羌活、獨活、紫蘇是也。下之者。枳殼、枳實、青皮、厚樸、山查、前胡是也。清之者。山梔、黃芩、黃柏。甚則犀角、黃連。消痰則以膽星、樓仁、杏仁爲主。若脈洪大而浮軟無力。或絃緩而澀。其人氣委而靜。此不足之證。用藥則以涼血生血滋潤消痰。涼之者。丹皮、白芍是也。生之者。生地、當歸是也。潤之者。苡仁、知母、花粉是也。消痰則以貝母、樓仁、杏仁。兼用山梔、黃芩、黃柏、犀角、黃連。或有純是陰脈者。或有純是陽脈者。當以病治病。脈不與矣。卽以荊芥、防風、牛蒡、射干、黃芩、枳殼、銀花、獨活、生地、丹皮、花粉爲治。再卽以保命丹。或紅內消同服。日用吹藥。夜用噙藥。無不見效。更有一種熱病而服熱藥。火毒熾甚而發於喉間。大寒大熱。疼痛不止。或舌脹而木。伸縮不能。飲食難進。其脈洪實有力。大便不行。宜急下之。若脈洪弦而浮無力。宜涼血行血爲主。若過用疎風散火之劑。恐變別證。最稱難治。又有一種出外急走遠路。脫力而傷肺氣。喘息難舒。以致喉痛舌脹。地閣下腫。突如鎖喉之狀。內視之非重舌。外視之非痰毒。寒熱大作。痰涎洶湧。六脈洪大中空。面色發黃而浮。初以防風通聖散探之。或效一二。卽以涼血生血順氣之藥治之。又有似喉證非喉證者。其喉亦痛。牙關緊閉。胸脅疼痛。或腹脹痛。四肢攣厥作痛。此因受有重傷。或用力太過。致瘀血凝滯。當以行血破瘀爲要。初起可救。過五六日不治。又如弱證喉癰。雖是肺經之病。亦有兼他經而起者。何以知之。假如喉間紅癰作痛。是肺經火盛之故。若頸項之筋。有時或左或右作脹而梗。氣悶不快。此怒氣傷肝。左關脈必洪大而弦。當清肝火。以舒筋涼血爲主。用藥則以當歸、牛膝、佐以柴胡。

黃芩、羚羊。若兼右關微弱而緩，乃脾胃有虧，須兼用白芍、茯苓。此肝脾與肺其病也。喉間紅瘰作痛，其舌紫色，或生刺作痛，或作木乾枯，是心經受虧，無血榮養，以致虛火熾盛，且兼思慮過度，鬱氣所成。左寸脈必浮洪，當以犀角、黃連爲主，佐以當歸、白芍。此心與肺其病也。喉間紅瘰作痛，滿唇焦裂，口熱如燒，或作乾嘔，是胃經虛火熾盛，右關脈必洪弦且緊，當以山梔、黃芩爲主，佐以當歸、白芍、山藥。此胃與肺其病也。喉間紅瘰作痛，夜間舌乾口苦，湯水不進，或有嗽而無痰，更兼滑精者，是腎水枯竭，虛火上炎，兩尺脈必洪數無力，當以山藥、知母、黃柏爲主，佐以花粉、澤瀉、白芍、茯苓。此腎與肺其病也。若夫肺經獨病，或吐血而成，或嗜酒而發，或脾瀉而生，氣血消散，嗽重聲啞，喘急痰多，聲如曳鋸，睡臥不得，六脈洪大而浮，肺部更甚，當以苡仁、山藥、貝母、黃芩、樓仁、牛蒡爲主，佐以當歸、白芍、熟地、茯苓、丹皮、犀角、黃柏、知母。服之喉痛雖止，然不過待日而已，更有六脈沈隱，神脫氣敗，飲食不進，步履不前，盜汗自汗如雨，脾氣溇泄，死無疑矣。若年老人喉間紅瘰作痛，或舌上生刺，或破腫，或木脹，言語不清，六脈微洪，五至有餘，飲食動靜，形色神氣如常，此血少火盛，當以黃芩、丹皮、茯苓、熟地、當歸、白芍爲主，佐以元參、牛蒡、枳殼、銀花、花粉、山藥、苡仁。甚則加犀角、黃連，不同前論。若小兒痘後或瘡後患此，當以犀角、黃連、敗其熱毒，更以涼血補血健脾之藥佐之。朮、草、參、芪斷不可用。此外用藥與大人相同。若女人胎前患此者，先以安胎爲主，次以涼血爲佐。紅內消、保命丹忌用。餘藥無妨。產後一月未滿者，當以熟地、當歸、補血、枳殼、青皮、下氣、元參、射干、牛蒡、元胡索、銀花、消腫，少加黃芩、花粉，以清熱。紅內消保命丹可用，但不宜多。吹藥噙藥忌之。如經期適來，當

以破血下氣之藥爲主。涼血者少用。紅內消、保命丹、噙藥服之亦無忌。茲論其大略如此。餘詳各條。

通治用藥

夫喉證向有三十六法。今余列十八證。名目雖簡。而治法已備。要之十八證中。又可以風與痰與火概之。凡遇此證。不論緩急。只以下氣消痰爲主。次則清火涼血。若不分先後。混亂用藥。貽害匪淺。今開用藥大概於左。惟高明者臨時參用可耳。

藥用防風、前胡、丹皮、獨活各一錢。杏仁、樓仁、山查各三錢。車前、木通各八分。兩劑後加山梔、膽星各一錢。生地二錢。如火未息。加黃芩一錢。以保命丹、紅內消同服。

誤用黃連、半夏、生薑、桔梗之類。難以收功。照前方加羌活、獨活。服幾劑自愈。牙關難開。須加真北細辛一分。

單蛾、雙蛾。至八九日後。方可用鍼刺出毒血。未滿十日。萬不可刺。

或有疔瘡根腳。紅內消不可用。用之反凶。煎藥中加地丁、草七、八錢自愈。保命丹可服。

頸間痰毒。須加象貝母、草河車、猴薑。若日久難愈。以蝦蟆一箇。研好。硃砂五分。灌於中。泥裹。煨研末服之。自消。

用藥禁忌

古有甘桔湯。乃清喉之要劑。今人見有患喉證者。卽用之而無疑。嗟乎。此猶抱薪救火。非能愈疾而更增。

其疾矣。何以言之。夫喉證乃火毒上升所致。須以降氣瀉火爲要。甘草補中而不瀉火。既受其補。則火愈熾。病愈重矣。桔梗引諸藥上行。藥既上行。則痰與火亦引之而上行。勢必喉間壅塞。於病更加重矣。或小兒驚痰。大人痰火。桔梗是最忌者。本草云。升麻引胃中清氣上升。又可代犀角。似乎可用。不知一用。其痰火與氣一齊上湧於咽喉之間。四肢逆冷。喘急異常。爲害匪淺。若在他證。猶或可用。如鎖喉服之。則不治矣。半夏雖消痰。若喉證痰重者。誤用之。禍不旋踵。蓋此乃治脾家溼滯之痰。至於喉證有痰。總不外肺中熱火。何可以半夏之燥烈治之乎。老薑辛辣發散。雖喉證亦以發散爲主。然過用辛辣之味。則以火益火。大非所宜。此五者與喉證關係甚重。故特表而出之。至別藥之中。亦多禁忌。惟業醫者審擇用之。茲不多贅。

丸散方藥

牛黃解毒丸卽噙藥

治一切喉風痺閉。咳嗽喘急。痰涎壅塞。胸膈迷悶。並口舌等證。無不見效。

牛黃五分 青黛飛淨

冰片五分

雄黃五錢

兒茶三錢

官礬五錢

薄荷另研

膽星四兩

研細末。生蜜和丸。如芡實大。每噙一九。待其自化嚥下。一日夜須噙四九。小兒減半。

紅肉消散

治咽喉一切諸證。並無名腫毒。已潰未潰。均可仗用。厥效如神。

大蜈蚣去頭足切斷同米炒以黑爲度

乳香去油

沒藥去油

血竭另研

雄黃

象貝母

川山甲炒

辰

砂水飛淨麝香揀去毛皮乾研

右藥等分。惟麝香少許。研細末。每服七分。小兒減半。和煎藥同服。酒下亦可。

保命丹錠子

治咽喉口齒新久腫痛。並解諸毒。磨服神效。

麝香揀去毛皮乾研三錢

辰砂明透者水飛淨三錢

冰片梅花大塊一錢

珍珠研細末一錢

琥珀一錢

山豆根汁另熬

文蛤洗淨煨一兩

山茨菇洗淨焙二兩

雄黃鮮明大塊研淨三錢

千金子白者去油一兩

紅毛大戟浙江紫大戟爲上北方綿大戟

不堪用去蘆根洗淨焙乾爲末一兩四錢

右藥研末。以糯米粥和山豆根汁打糊爲錠。每重一錢。病輕者一錠。重者連服二錠。

膽冰消毒散初起吹藥

血竭一錢

膽礬一錢

雄黃一錢

乳香去油三錢

冰片一錢

白占二錢

燈心灰不拘

冰硼散收功吹藥

冰片一錢

硼砂一錢

山豆根二錢五分

玉屑散一名五馬破曹

治咽喉口舌頸項破爛諸症皆效。

薄荷三兩另研

官礬三錢五分

雄黃一錢

兒茶一錢

冰片三分

右藥研細末貯瓷瓶內臨用挑少許置舌上咀含片刻嚥下日用八九次如鎖喉風口內乾枯牙關緊閉不能咀含者以無根水灌下自能開闢生津惟脾虛胃弱者不宜多用。

鎖喉第一

此證因風熱積於胸膈或酒色及鬱怒所致其狀喉上下左右紅紫腫痛或帶丁焦黑腐爛頸項浮腫痰涎壅塞聲響如潮氣急發喘眼目直視額上有汗如珠身汗如雨或泄瀉清水四肢厥冷或腰脅疼痛肚腹脹痛法在不治若脈六七至不論大小至數分明雖甚危險十中可救一二或脈洪大或沉細惟三部混亂即形色神氣如常終為難治初起用吹藥噙藥痰多以高年青根搗汁和醋搨去痰涎或土牛膝汁或青魚膽汁俱可。

加減荆防敗毒散

脈洪大七至用之

荆防風牛蒡連翹膽星獨活前胡枳殼蘇子樓仁杏仁生草黃芩黃柏山

梔元參加原枝燈心二十莖長流水煎和保命丹同服大便不行去荊芥防風加枳實青皮大黃

加減柴胡雙解散

脈沉隱或三至用之

柴胡前胡羌活獨活枳殼枳實川芎青皮樓仁杏仁膽星蘇子長流水煎

和保命丹同服冬月加麻黃

脈七八至而浮洪頭面皮肉浮腫色微紅涕淚交流語言塞澀或以防風蘇子銀花牛蒡杏仁樓仁枳殼

枳實、膽星、青皮、黃柏、黃芩、山梔、元參和保命丹同服，亦有獲效者。

服荊防敗毒散後，肺管脹塞，兼咳嗽者，卽加生地、當歸、白芍。

服敗毒散一劑，喉痛頓減，惟胸膈脹痛，牽引脊背，再服之卽除。

服三黃湯，亦有全愈者。

蜒蚰同白梅搗爛和丸嚙之，每見有效。

誤用大黃、巴豆瀉利不止，喉證雖愈，而胸膈脹悶，飲食不進，醫復誤作他證治者死。

重舌第二

此證因平日喜食炙煇熱毒之物，積熱攻於心脾二經所致。其狀舌下腫，突生一小舌，久之大舌反縮短，或脹而紫，言語不清，飲食不下，微作寒熱，口中清涎極多，卽用銅匙將舌捺定，用三棱針刺大舌兩旁，及舌下金津玉液兩穴，各一針，可五分許，再刺小舌兩旁，或出紫血，或待清涎流盡，方進吹藥嚙藥，次服煎劑自安。

藥用荊芥、防風、連翹、獨活、前胡、射干、膽星、枳殼、元參、生地、黃芩、黃柏、銀花、花粉、長流水煎，如刺破，清涎出盡，亦有弗藥而愈者。

氣癰第三

此證因惱怒傷肝，肝血不和，以致肺氣壅塞，火熾上升，發於喉間，其狀帝丁之上，紅腫作痛，或有連及兩